

rencontre y arriuant d'icy, continuant de cheminer au Midy ou Sudest, il y a enuiron quatre iournées de chemin iufques à l'emboucheure de la Riuiere si celebre de cette Nation, dans l'Ontario ou lac de S. Louys. Au deçà de cette Riuiere, & non au delà, comme le marque quelque Charte, font la plus part des bourgs de la Nation Neutre. Il y en a trois ou quatre au delà, rangez d'Orient à l'Occident, vers la Nation du Chat, ou Eriechronōs.

Cette Riuiere ou Fleuue, est celuy par lequel se defcharge nostre grand lac des Hurons, ou Mer douce; qui se rend premierement dans le lac d'Erié, ou de la Nation du Chat; & iufques là elle [50] entre dans les terres de la Nation Neutre, & prend le nō d'Onguiaahra, iufques à ce qu'elle se foit defchargée dās l'Ontario ou lac de fainct Louys, d'où en fin fort le fleuue qui paffe deuant Quebec, dit de S. Laurens. De forte que si vne fois on estoit maistre de la coste de la mer plus proche de la demeure des Iroquois, on monteroit par le fleuue de fainct Laurens fans danger, iufques à la Nation Neutre, & au delà de beaucoup; avec epargne notable de peine & de temps.

Suiuant l'estime des Peres qui y ont esté, il y a bien au moins douze mille ames dans toute l'estenduë du pays qui fait estat de pouuoir encore fournir quatre mille guerriers, nonobstant les guerres, la famine, & la maladie qui depuis 3. ans y ont extraordinairemēt regné.

Après tout, ie croy que ceux qui ont autre fois donné tant d'estenduë à cette Nation, & luy ont donné tant de peuples ont entendu par la Nation Neutre, toutes les autres Nations qui font au Sud & Suroüest